

IN FUNERE
ILLUSTRISSIMI DOMINI
APOSTOLI ZENI
VENETI CIVIS,

Nobilisque Cretensis,
HISTORICI ET POETAE CAESAREI

ORATIO

P. F. HYACINTHI MENEGATTI

Ordinis Prædicatorum Philosophiæ Lectoris,

Habita in Templo Sanctissimi Rosarii pridie
Idus Novembres MDCCL.



VENETIIS
APUD SIMONEM OCCHI
SUPERIORUM PERMISSU.
MDCCL.



I quid a præpotente rerum
 omnium moderatore DEO O-
 ptimo Maximo enixis o-
 mnium votis esset optandum,
 quod in summam totius hu-
 manæ reipublicæ redundaret
 utilitatem, id, arbitror, u-
 num foret, ut Viri quidam eximiis admodum
 dotibus præfulgentes, ac supra ceterorum ho-
 minum conditionem quodammodo evecti, im-
 mortali vita fruerentur. At quoniam æterna
 constantique supremi Numinis lege sancitum
 fuit, ut homines singuli post certam, magis
 minusve productam; annorum seriem e vi-
 vis tollantur: hinc bene ac sapienter huma-
 no consilio statutum est; ut communia vo-
 ta communis fletus excipiat; ac dolen-
 dam maxime; & nunquam satis pro meri-
 to deplorandam præclarissimorum virorum ja-
 cturam, quæ præpediri non potest, nec valet
 reparari, publica quædam & solemnitas tristi-
 tiæ ac mæroris significatio testetur. AEquum
 id profecto ac sanctum inficiabitur nemo, ut
 scilicet discernantur optime disparium insigni-
 ter hominum diversa merita: neque infimæ
 notæ & obscuri nominis hominum, ac illu-
 strium virorum, & famæ nominisque claritate
 præstantium interitum eadem funera subse-

quantur. Quem autem putatis, Auditores, ex animem hic jacere, mox sepulcro occludendum? Non is herele vulgaris homo, cujus acerbum fatum intra domesticos parietes sit tantum privatæ familiæ, grave damnum perpeſſæ, ſqualore & lacrymis proſequendum: ſed vir præſtabilis maxime, cujus extremus dies, publico bono valde calamitoſus, uberiores multo & publicas querimonias ac gemitus promeretur. Non is item communis homo, cujus nomen & recordatio ſimul cum cineribus offibusque ſit funebri lapide ac ſepulcri tenebris obruenda: at vir ſane eximius, cujus nominis fama adhuc poſt innumera ſecula ſuperſtes erit cum gloria & laude conjuncta, immo nulla futuri temporis oblivione delebitur, quin immortalis ad poſteritatem omnem devolvatur. Jam ſentit Urbs hæc noſtra amiſſum ornatiffimum civem, quo incola non immerito gloriabatur, aliisque permultis erat invidiæ cauſa: extinctum dolet Italia ac maxima Europæ pars eruditiffimum virum, ſive, ut verbis Græcorum Oratorum Principis utar, ἀνδρα γνωριμώτατον, καὶ ὀνομαſτότατον, καὶ ἐνδοξότατον ἐν ταῖς πόλεσι, τὸν παιδείας ἀληθῶς τετυχηκότα, ex quo honoris & ornamenti plurimum ſemper perceperat: literaria tota tandem reſpublica præclariffimum ſibi de-

decus luget ereptum, a quo splendorem suum
 noverat magis auctum, suamque gloriam sem-
 per amplificandam deinceps sibi pollicebatur.
 Neque ad leniendam tantam doloris acerbita-
 tem valet cogitatio, eum sibi satis vixisse, qui
 ad tertium usque supra octogesimum annum
 vitam perduxit, &, quod mirum est, otiosam
 numquam, sed studiorum laboribus semper
 districtam: cum ad acuendum immo luctuo-
 sissimæ jacturæ sensum verior cogitatio altera
 subeat, satis ipsum nequaquam vixisse & a-
 liis, & literariæ præsertim reipublicæ, quem
 in aliorum utilitatem, in literariæ ejusdem
 reipublicæ beneficium, decus, & incrementum
 semper vivere oportuisset. Quoniam igitur ip-
 sum diro fato sublatum conspiciamus omnes,
 omnes dolemus, mihiq; licet invito ac fru-
 stra obsistenti, arduum & difficillimum hac
 die dicendi munus commissum fuit; non ego
 universa & singula, quæ merito essent in tanti
 Viri commendationem promenda, oratione
 complectar: sed pro constituta mihi tempo-
 ris brevitate & dicendorum copiar, & oratio-
 ni modum imponens, fore satis opinor, si
 ipsum in utroque eruditionis ac pietatis ge-
 nere præstantissimum extitisse, atque adeo u-
 troque hoc honorificentissimo eruditionis ac
 pietatis titulo celebrandum ostendero. Quod si

oratio mea non talis evadet , qualem & meâ vota , & expectatio vestra , & summi Viri præcella merita exposcerent , quæso vos obtestorque , Auditores , ut hoc unum mecum sentiat , & me imparẽ omnino fuisse APOSTOLI ZENI laudibus persequendis , & solum fortassis similem illi virum ejus extollendis præconiis parem fuisse futurum .

CUM probe noverint æquissimi rerum æstimatores ornamenta illa omnia , quantumlibet spectatissima , quæ aut ex vetusta familiæ nobilitate , aut ex majorum præclare factis proficiuntur , vel parvi esse facienda , vel omittenda penitus , dum homines ad potiora alia decora conquirenda , ad præstabiliorem comparandam sibi gloriam semper intentos laudibus exornare contingit : plurima mihi , de APOSTOLO ZENO dicenti , integro sunt prætereunda silentio , quæ aut alienas redolerent laudes , aut nimio studio & arte quæsita videri possent commendationis subsidia ; cum ipse egregiis suis dotibus ac promeritis locupletissimam orationis copiam supeditet . Non ergo illustre hujus Viri genus occurrat , ex nobilissimo inter Venetos Patres
ZE.

ZENORUM sanguine repetendum ; quamvis e Patria Urbe Cretam coloniæ caussa traducto ; at eximium potius obversetur ingenium, quod sibi multiplici studiorum genere excolendum proposuit, sollicitudine tanta, ut cetera omnia semper despexerit, facilitate tanta, ut nihil ipsi impervium & inaccessum evaserit, tanta demum felicitate, ut fructus sit uberri- mos & amplissimos consecutus. Quamquam vero eo se instructum ingenio sentiret, quod in summo homine postulabat Marcus Tullius, dotibusque omnibus ab ipso Oratorum Princi- pe enumeratis præstaret, videlicet ad excogi- tandum celeritate & acumine, ubertate ac per- spicuitate ad explicandum ornandumque, ad memoriam denique firmitate ac diuturnitate, ut proinde nihil in toto liberalium disciplina- rum ordine sibi non posset polliceri : optime tamen cautus & prudens, ne per late patentem artium & scientiarum omnium provinciam in- constans excurreret, profanas literas, in qua- rum studio potissimum versaretur, selegit, at- que ex eis poeticæ arti & eruditioni præser- tim strenuam operam navare constituit : eru- ditioni, inquam, quæ non patruorum ejus dumtaxat, sed avorum etiam proavorumque, immo totius ZENORUM gentis proprium ac perpetuum fuisse constat decus & ornamentum,

defuturum numquam, nisi præclara hujusmodi ingenia defecerint.

Quantum autem vel ab ipsa ætate prima ineunte in hoc pulcherrimo literario pulvere defudaverit, quanta animi contentione, quantis virium conatibus, quanta perpeffione laborum, quanta vigiliarum frequentia, quanto bonæ valetudinis detrimento, quanta ad extremam usque senectutem assiduitate, quid fari attinet, aut quis potis est enarrare? Satius profecto sit dicere (quod aliorum pace sit dictum) ipsum, eximii hujus stipitis germen postremum, non modo suis patruis, jamdiu ingenti cum gloria demortuis, non solum eximio extincto Fratri, adhuc fama nominis celeberrimo, sed & majoribus omnibus præstitisse, ac tanto insigniorem tulisse palmam, quanto longius omnium sp'endorem ac multiplicem cognitionem ipse claritate nominis atque eruditionis amplitudine superavit. At non ita solum domesticis antecelluit; quod fortassis non esset in ejus summa laude ponendum: verum & inter externos plurimos hujus nostræ omni bonarum artium studio florentissimæ ætatis clarissimos viros mirum in modum effulgit; quod maximum utique ejus præconium efficere nemo non intelligit. Quis enim in conquiendis optimorum auctorum libris magis sollicitus

&

& industrius? Quis in iis evolvendis magis frequens & assiduus? Quis in illis exquisitissime percipiendis magis perspicax & acutus? Nimirum pro ea, qua pollebat, mentis acie quæcumque in comparatis versatisque voluminibus comperiebat, ad trutinam revocabat æquissimam, ut vera seligeret, falsa respueret, auctores ab auctoribus segregaret, conciliaret dissidentes, aberrantes negligeret. Ad quod sane negotiosum præclarum opus non cujusvis ingenium fuisset idoneum, sed illius tantum, cujus eximia foret in percipiendo facilitas, optima in discernendo solertia, exquisita in judicando maturitas. Quis etiam antiquitatis totius ac monumentorum veterum isto peritior, qui hujusmodi omnia, sive obsignata numismatis, sive insculpta lapidibus, sive historiarum libris mandata, inflammato studio, sedulitate incredibili, cumulatissima cognitione permensus est, ut in hoc rerum genere (absit verbo invidia) parem illi fortassis ætate nostra concipere non succurrat?

... , τίς ὁμοίος; ἢ τίς ἀπάντων,
 Τίσσοις ἑὼν, πόσσης εἴλε κλέος σοφίης;
 Οὕτις ἐπιχθονίων

Ipse locorum varietates, regionum situs, rationes temporum, ipse populorum origines, instituta, mores, leges, fœdera, bella, gesta, faci-

cinora, clades, triumphos, ipse singulorum Regum, Principum, aliorumque in dignitate positorum virorum stirpes, cognationes, affinitates, jura, successiones noverat optime, callebat exquisitissime, & melius forsitan accuratiusque, quam sua sit privato cuilibet nota familia, quam suum sit cuique genus comperit. Absolvam brevius: vix aliquid ex toto amplissimo eruditionis ordine afferri poterat, quod illi novum & inauditum evaderet, quod non immo esset illi perspectum prorsus exploratumque.

Hæc me, quamvis ingentia & sublimia, de APOSTOLO ZENO prædicantem mentiri non finit fama ejus eximia, quæ brevissimo temporis intervallo Urbis hujus, ac universæ Italiæ fines integros prætergressa, & per plurimas, omnes immo Europæ regiones longe lateque diffusa, absentes pariter ac præsentis, alienos pariter ac domesticos, externos pariter ac finitimos in unius hominis singularem admirationem traduxit, ut merito ipsum possimus dicere, quemadmodum virum quemdam præstantissimum dictum legimus,

Ἀστροπὴν γὰρ πείρασι λαμπομένην.

Quæ est enim Europæ Urbs, in qua non resonet ejus nomen, præconiis non extollatur ingenium, studiosi conatus non celebrentur, eru-

ditionis copia & amplitudo non suspiciatur? Id autem quantum sit honoris atque existimationis fastigium, vel ex eo intelligitis, Auditores, quod paucis admodum, & præclarissimis solum quibusdam viris datum sit illuc aliquando tandem pertingere: quam vero & cito & certe illud APOSTOLUS ZENUS fuerit inter ceteros consecutus, attendite. Quamquam etenim non ausim dicere, quod de Tito Livio Romanæ Historiæ Scriptore Principe narratione certissima circumfertur, e longinquis ac semotis valde regionibus Romam profectos fuisse nonnullos illustres viros, ejus nominis fama pertractos, ut tantopere celebratum hominem cominus intuerentur (ne quid honorificentius, quam verius, videar de isto enunciare:) affirmare tamen non ambigo, neminem fuisse, vel mediocriter in re literaria versatum, qui ad nostras oras appulsus, ad eum semel, iterumque, ac sæpe invisendum non se contulerit, ut eruditissimo ejus colloquio frueretur; neminemque ferme ab eo recessisse non maximopere admiratum hominem de rebus plurimis & variis subinde propositis tam promte & facile, tam dilucide & copiose, tam ornate & exquisite verba facientem. Sed & præstabilius forte aliquid dicam, ac vere dicam, continenter ad eum missas fuisse a clarissimis
to-

totius pene: Europæ viris epistolas, quod egrégios studiorum suorum conatus, operumque edendorum præclara molimina cum ipso communicarent; atque ab eo pro rerum diversitate vel optima consilia reciperent, vel opportunis monitis instruerentur, vel occulta quædam & abdita mutuarentur eruditionis subsidia. Neque res cujuscpiam spem & vota falleret, quin singulorum spem & vota expleret abunde. Immo quemadmodum præteritis olim temporibus factum fuisse memoriæ proditum est, ut ad D. Hieronymum in Orientis partibus domicilium habentem, veluti ad sacræ doctrinæ oraculum, ex ceteris terrarum orbis partibus dirimendæ ac explicandæ deferrentur sacrorum librorum quæstiones; & in sapientissimi viri maximique Doctoris sententia omnes acquiescerent; ita simile quippiam ætate nostra factum deprehendimus, ut ad APOSTOLUM ZENUM hac in Urbe degentem, ceu ad arbitrum, ex permultis Europæ regionibus deducerentur exorta inter literatos viros dissidia; atque ipso doctissimo & æquissimo iudice contentiones omnes penitus tollerentur, omniaque partium studia cessarent. Scilicet, quemadmodum in sacris literis apud Orthodoxos omnes Doctores magnum fuit Hieronymi nomen, auctoritas, & iudicium: ita in profanis literis apud

apud quamplurimos Europæ eruditos homines APOSTOLI nomen, auctoritas, & iudicium videtur maximo in pretio fuisse. Hoc autem in munere, utique satis arduo perdifficiliq̃ue, præstando sic se gessit semper, mirifice sic semper excelluit, ut non solum ingenium in rebus plurimis probe versatum, plurimis cognitionibus imbutum cumulatissime, ad omnia aptum & expeditum ostenderit; sed etiam in re odii & invidiæ plenissima belle composita sibi ipsorum dissidentium animos conciliaverit.

At honorificentissimam hanc plurimorum hominum de APOSTOLO ZENO præclare sentientium concordiam uberius multo & locupletius, atque omnium instar testatam fecit magnus ille Cæsar, & summus Imperii Princeps CAROLUS VI. qui, cum de seligendo præstantissimo viro, cui utrumque Cæsarei Poetæ & Historici munus committeretur, esset valde sollicitus, hujus pervulgata existimatione permotus, hunc censuit ceteris omnibus præferendum, ac multiplici cum honore jam triginta circiter abhinc annis Cæsaream in aulam vocandum. Insigne hoc dubio procul & satis gloriosum hominis privati fastigium: multo tamén ad laudem ejus illustrius atque speciosius est, non ipsum fortuito eventu, vel, ut
feri

fieri solet, summorum virorum ope interposita, sed unica meritorum vi fuisse assecutum; ipsique omnium judicio ita respondisse, ut non æquaverit solum, sed longe etiam vicerit famam omnem, omnemque præconceptam expectationem. Non etenim se prodidit dumtaxat eis ingenii & eruditionis dotibus præpollentem, quibus ad commissæ sibi potissima munia obcunda apprime foret idoneus; verum & ad alia plura ac majora; nova & insolita, operosa magis & magis ardua, mentis acumen, maturitatem consilii, prudentiæ vim singularem, incredibilem cognitionem nec paucis, nec levibus speciminibus patefecit. Quid quod præter hæc, pulcherrima alia sui ornamenta omnium oculis exhibens, æquitatem judicii, recti constantiam, virtutis amorem, integritatem vitæ, morum probitatem, oris ac frontis hilaritatem, suavitatem ac venustatem sermonis, virorum omnium aulæ Principum animos sibi devinxit, adeo ut non tantum universis & singulis gratissimus semper extiterit, sed & ipsi CAROLO, optimo ceteroquin hominum æstimatori, fuerit quammaxime acceptus? An non enim certo constat, quemadmodum summus ille Imperii moderator eum non solum existimatione peculiari, sed singulari etiam amore prosequeretur; quemadmodum & privatim
& pu.

& publice sæpius significaverit, quantus esset, & quanti faciendus; quemadmodum frequentissime & in rebus gravissimis expediendis ejus consilio, & in capiendis animi oblectationibus ejus colloquio uteretur? An non omnino compertum est, multiplicibus his benevolentiae significationibus beneficentiae significationes totidem accessisse, cum & ipsum eximiis muneribus sæpius ornarit, & ipso pro aliis petente (noverat quippe eum ob animi sui integritatem nihil, nisi quod rectum & æquum esset, petiturum) nec lectis libellis supplicum, neque audita supplicum causa, omnes votis compotes sæpe dimiserit? Verum utriusque suæ erga privatum hunc hominem & benevolentiae & beneficentiae potiora argumenta tunc præbuit invictissimus Cæsar, quando ipsum, regionum utique illarum vitio, crebris adversæ valetudinis incommodis conflictari prospiciens, post annos ferme undecim, ægro licet animo, maluit eum ad patriam Urbem reverti, ac sub alio cælo abesse incolumem, quam illic frequentissimis obnoxium morbis, & in perpetuo vitæ discrimine constitutum versari. Quemadmodum autem discedentem ex aula beneficiis innumeris cumulavit: ita jam absentem ac patriæ restitutum immemor non neglexit; quin velut præclare emeritum militem

haud

haud exiguo perpetuo stipendio donavit. Quod præstare numquam omisit post Patris obitum ad extremum usque hujus diem augustissima Hungariæ & Bohemiæ Regina, jam ad Imperii dignitatem evecta, Patris exemplum plane secuta, patriisque curis susceptis, ne videlicet tanti Viri merita, sibi etiam probe perspecta, digno præmio destituerentur.

Quid tamen ego ad hujus inclyti Viri celebrandam eruditionem extranea tot diutius persequor argumenta? Nonne argumenta alia intima suppetunt, quæ singularis eruditionis ejus præstantiam melius multo ac certius persuadent, siue Musæum ab ipso collectum, siue instructa ab ipso Bibliotheca, siue opera plurima ab ipso publicam in lucem producta? In illo cernere erat speciosissimum vetustarum rerum thesaurum, in quo non numismatum varietatem maximam & copiam uberrimam, sed accuratissimam collectionem ac seriem exquisitissimam mirareris, quodque non rerum ipsarum, sed raritatis potiore pretio æstima- res. In illa spectare licet librorum pulcherri- mam suppellectilem, quæ tota erat domus ejus supellex, ipsa tamen Attalica suppellectili nobi- lior atque locupletior, qua maxime & unice gloriabatur: eamque tam belle, tam apte, tam miro ordine concinnatam ac digestam, ut non
in-

ingentem voluminum multitudinem, sed eximium potius delectum obstupefcas, eamque & privati hominis facultatem excedere, & cum magnificentia Regia certare decernas. In utroque autem pronum fuit semper cuivis & ejus laude dignam industriam ac studium agnoscere, & præconiis amplioribus extollendam ejus scientiam atque eruditionem suspicere; ita ut vel doctissimi quique professi fuerint, utrumque hoc nonnisi a summo viro potuisse præstari. Quid vero dicam de editis ab ipso operibus, tam multis, tam variis, in quibus omnibus & singulis, sive res, sive verba, sive stilus, sive ordo, sive claritas, sive facilitas, sive sententiæ, sive ornamenta inspiciantur, vulgare nihil, nihil exile, nihil incultum, demissum nihil; sed pulchra omnia & excelsa, omnia gravia & elegantissima, sublimia omnia & perpolita, absoluta numeris omnia, omnia miranda.

At hic etiam atque etiam rogo vos, Auditores, date mihi hanc veniam, ut negotiosum valde munus caute declinans, neque eorum numerum vobis percenscam, neque suscepta in singulis argumenta vobis subjiciam, ne præter temporis modum excurrat oratio. Unum dicere sit satis, cum ab ipsa adolescentia incunte ad ultimam usque senectam in elucubran-

B

dis

dis operibus, quæ publici juris faceret, strenue ac naviter defudasse. Prætereo igitur haud pauca insignium auctorum opera, quæ e Gallica lingua in Italiam nostram transtulit, aliorum ita utilitati prospiciens, ut pluribus essent profutura. Nihil etiam consulto dicam eorum, quæ vix adolescentem ingressus ætatem ligata numeris oratione conscripsit, typisque mandavit; cum ea, velut provectiore ætate minus digna, jamdiu tanquam sua agnoscere detrectaverit (quemadmodum & Tullius de Inventionem libros simili ætate exaratos, ceu grandiori ætati minus consentaneos, respuebat:) quamvis alioquin haud obscure maturioris ingenii conatus majores præstantioresque fœtus portenderent. Verum firmioribus annis elaborata ab ipso poemata, modis musicis concinnanda, ea sunt, quorum singula dici possunt

..... *mirabile visu*

Calatumque novem Musis opus ...

universa autem ob honestatem, gravitatem, sublimitatem, atque eruditionem multiplicem, sive sæpius publice exhibita cum Viennæ in Austria præsertim, tum in aliis Italiæ & Europæ Urbibus, sive mandata prælo, & late longèque propagata, summisque audientium & legentium plausibus semper excepta, incredibilem

lem

lem ei claritatem nominis pepererunt. Sed potissimum ac facile principem inter ejus opera locum sibi vendicant illa volumina, in quibus modo unius, modo alterius, multorum modo, modo singulorum hominum in literaria republica valde præstantium exquisitissimam narrationem instituit; eorum nomina, familias, patrias, ætates, gesta, scripta, decora, dotes, merita ita accurate persequens; nihil ut ad rei difficillimæ perfectionem desideretur. Id autem facinoris fatebitur profecto quisque nemini fortassis omnium debuisse in mentem venire, neque ab alio quoquam fortassis suscipiendum fuisse; quam; ab hoc cruditissimo viro, cui nullus auctor erat ignotus; qui omnium judex optimus esse poterat, ut alios ab aliis discerneret; atque singulorum merita probe comperiens, æstimaret singulos, quanti valerent. Quod cum præstitit, quot recondita, obstrusa, & a communi hominum cognitione procul seposita patefecit! Quot vetustate nimia, aut diuturnitate temporis tenebris obruta, vel obruenda deinceps æternam in lucem perduxit! Quot oblivione prope contrita, vel certe in posterum absumenda a luctuosissimo interitu vindicavit! Nos igitur tot tantorumque beneficiorum effecti compotes, & futurorum omnium seculorum homines eadem beneficia

percepturi, immo literaria tota respublica huic præclarissimo viro & tam emerito bonarum artium cultori plurimum se debere profiteatur, qui, quemadmodum impigro assiduoque labore ac studio ad amplissimam sibi eruditionis supellectilem comparandam se totum tradidit, ita pari contentione & industria ad eandem non in propriam utilitatem atque honorem, sed in publicum dumtaxat decus & commodum conferendam totus semper incubuit.

Verum enimvero eruditioni tantæ, unde maximum hujus Viri decus effluxit, quod unum ad speciosissimam atque perhonorificam commendationem ejus sufficeret, alterum eximie pietatis ornamentum accessit, quod præconiorum ejus copiam amplificat. Mirum sane ac memorandum! Homo, qui ita ingenio multiplicibus studiorum generibus excolendo totus erat addictus, ut negotiosis officiis omnibus, civilibus curis, politicisque occupationibus se subduxerit, ut numquam vel honestissimo otio indulgeret, numquam vel ingenuis oblectationibus animum recrearet, ut brevissimam ipsam nocturnam quietem literariis exercitationibus interciperet, ut vel ipsa, ferme dixerim, ejus respiratio a studio sejuncta non videretur: homo, inquam, hujusmodi in excolendam simul pietatem, virtutesque animi comparandas ita
se

se totum impendit, ut hac una cogitatione, cura, & sollicitudine censeretur obstrictus. Scilicet, quemadmodum firmissime sibi animo proposuerat, ut acceptum supremi Numinis beneficio præstans ingenium otiosum non detineret; ita severissimam sibi legem indixerat, ut id, ad quod Christiano homini potissimum est adnitendum, præpostere non omitteret. Quapropter (etsi forte cuipiam incredibile sit futurum, quod dicturus sum, minimo tamen loqui vereor, quod in ore multorum est, quod locupletissimo plurium testimonio firmatur, quod, si de aliis, de hoc saltem uno enarratum fidem integram promeretur) consueverat ipse ab operosa studiorum sedulitate haud exiguam cujuscumque dici & noctis partem decerpere, in divinis recolendis mysteriis, in evolvendis sacris aut piis libris, in effundendis ad Deum precibus insumendam; immo præclaris his pietatis operibus quotidianas studiorum suorum rationes auspicabatur, intermiscibat, absolvebatque. At quam defixa mente, quo cordis affectu, quanto caritatis ardore divinis rebus vacabat, impositaque sibi pietatis opera peragebat! Ipsa frons, oculi, vultus denique totus, miro modo compositus, religione plenos sensus animi testabantur: quodque non sine admiratione sæpius plurimi conspexere, in

æquissimam ejus laudem abunde prædicare non ambigunt. Hinc, quamdiu ei per ætatem morborum expertem licuit, in sacris ædibus frequens erat, totus intra se abditus, summaque animi demissione res ac laudes divinas prosequebatur, sacrisque ritibus sese expiabat. Quando autem aliis atque aliis, & subinde quidem ingravescentibus, morbis cœpit conflictari, gravioresque ac productiores bonæ valetudinis pati jacturam; adeoque illi vetitum esse cœpit sacra loca lustrare, & publice congrua Religionis officia exercere: votis suis infensam necessitatem æquo animo ferens, idipsum repetitis privatis precibus, intentioribus amoris actibus erga Deum, diuturnioribus vulnerum Christi meditationibus (cujus e cruce pendens imaginem ob oculos positam semper habebat) frequentioribus erga Deiparam ac plures Superos cultus obsequiis uberius multo ac melius forte supplebat.

Cui intermisso numquam religionis studio, numquam deservescenti pietatis ardori acceptas arbitror referendas plurimas illas, non fucatas & fallaces, sed veras germanasque virtutes, quæ, sicut intime vigentes in ipso mirandum in modum ejus animum exornabant, ita se prodentes identidem, ac raris fulgoribus coruscantes, æquissimam aliis admirationis causam

sam præbebant. At, cum ad exitum perdu-
cenda videretur oratio, quæso vos, Audito-
res, eam paulisper adhuc ab exitu revocari
patiamini, ne videlicet hujus viri potiora de-
cora, amplioribus efferenda præconiis, inte-
gro a nobis silentio prætermittantur. An non
enim commemoranda saltem illa constantia,
qua tot tantaque adversæ valetudinis incom-
moda perferebat, cum per annos aliquot &
sæpe noctes insomnes traduceret, & novis quo-
tidie ferme doloribus torqueretur, & ad mo-
tum impotens cogeretur intra domesticos unius
aulæ fines consistere; omnia illi alioquin eo
titulo molestissima, quod ab eis, quas cupie-
bat maxime, literarum & pietatis exercitatio-
nibus, quantum vellet, prohiberetur? An non
indicanda saltem summa illa animi moderatio,
qua, licet sui & aliorum optime conscius,
tamen & sua flocci faciens, aut inaniter non
ostentans, & aliena non despiciens, aut, quan-
tum vere posset, extollens, severissima loquen-
di scribendique ratione, æque semper & alio-
rum contemptui ac dedecori, & sui cuicumque
jactationi ac gloriæ parcebat? Sed & in alte-
ro maximopere admiranda occurrit ejus ani-
mi moderatio, quod nihil minus, quam ob
eruditionis suæ copiam, ob suæ scientiæ am-
plitudinem, ob summorum virorum præco-

B iiij nia,

nia, plausus, atque acclamationes turgescens, sed totus semper ad lenitatem suavitatemque compositus, dedignaretur neminem, blande ac humaniter omnes exciperet, omnibusque, quas posset, verbo factisque suppetias adferret, nullo umquam invidentiæ sensu commotus, quasi splendorem suum ex aliorum claritate imminutum iri extimesceret. Quid loquar de integerrima illa vitæ ratione, qua non a gravioribus solum piaculis, sed a noxis etiam levissimis, quantum miserrima humanæ infirmitatis conditio patitur, sibi semper cavebat, in id jugiter ac sedulo incumbens, ut juxta divinæ legis præcepta, juxta saluberrima evangelica monita, juxta præclara Sanctorum vestigia se suosque mores componeret? Mirum, quanto venerationis sensu prosequeretur universa & singula Orthodoxæ Religionis arcana, a quorum curiosa & audaci perscrutatione abhorruit semper, semperque abhorrendum cuique censebat, nihil umquam proferens ipse, nihil ab aliis libenter audiens, nisi quod juxta Pauli præceptum ostenderet altissimis rebus illis, & a toto naturæ ordine immensum sepositis captivum plane intellectum humillimeque submissum. Mirum item, quemadmodum æternas fidei morumque veritates eo lubentius audiret, quo rudiori sermone enunciabantur,

hof-

hosque tantum , quotiescumque integrum illi erat, divini verbi præcones consulto perquireret, ne scilicet ob studiosa nimis eloquentiæ ornamenta ab eo, quod maxime intererat , animus distraheretur. Quam etiam demississime ei , quem sibi suæ conscientiae moderatorem selegerat, subdebatur, quam plene ac promte in omnibus ab ejus ore nutuque pendeat ! Quid referam , quam sæpe , & liberalitate quanta opitularetur miseris ac inopia vexatis quam sæpe & quantum ad res sacras & pios usus elargiretur, nullo divitiarum studio abreptus, nulla illectus cupiditate; quam demum caute id totum præstaret , ut vel ii ipsi, qui beneficia perciperent , minime agnoscerent ? Mirum denique & valde mirandum, hominem hunc , tot eximiis virtutum decoribus locupletem atque emicantem abunde, ita de se tenuiter & abjecte sensitse, ut, cum magnus ille vir , & meritorum optimus æstimator , **GEORGIUS** Cardinalis Cornelius Patavinorum Antistes vellet eum suæ Ecclesiæ Canonicis accensere (qui honoris gradus parvi certe ducendus non est, quandoquidem ad potiores alios aditus esse solet) ipse constantia summa renuerit , ratus se & dignitatis tantæ prorsus immeritum , & dignitati tantæ consentaneis dotibus destitutum . Quod cum ita sit, alias
nem-

nampe hominis hujus virtutes eximias & præclaras ex ejus singulari pietate fuisse profectas, cum in aliis, tum in hoc viro & certe & optime comprobatum agnoscimus Pauli dictum, pietatem ad omnia utilitatem asferre, idest, perhibentibus nonnullis Sanctis Doctoribus, pietatem fontem esse virtutum omnium, esse virtutum omnium parentem.

Quemadmodum autem amplissimæ viri hujus eruditionis maximo argumento sunt profana plurima opera ab ipso exarata; ita, sin virtutum omnium, pietatis saltem, quæ ceterarum princeps in illo fuit, pulcherrimum ac certissimum monumentum extant extabuntque perpetuo sacra poemata, ab ipso, Superis magis, quam Musis faventibus (si ita loqui licet) elucubrata, majestate tanta rerum, sententiarum tanta ubertate, tam exquisito verborum delectu, tam apto ordine concinnata, tantæ gravitatis plena, tanta suavitate conspersa, ut non solum cumulatissimam auctoris pietatem significant, sed etiam in omnium legentium vel audientium animis religionis sensum, studium virtutis, pietatis ardorem excitent, foveant, inflamment. Quod adeo est verum, ut in Cæsarea aula Viennensi, posthabitis insignium aliorum Auctorum similibus poematis, quod minus pietatem redolerent, una APOSTOLI

ZENI sacra poemata iterum ac frequentius fuerint adhibita, in annuis quibusdam celebritatibus concinenda, ipso CAROLO primum, ac ceteris summa semper admiratione ac plausu probantibus. Quid, quod vel ipse, quamvis de se cautissime semper locutus, & a qualibet laudatione sui semper alienus, cetera omnia a se typis prodita veluti negligens, hoc unum opus, occasione loquendi data, modestissime præferre consuevit?

Utramque igitur hanc spartam, literarum scilicet atque eruditionis, pietatis & virtutum, ornandam sibi proposuit APOSTOLUS ZENUS, atque ita quidem, ut neutri totus deesset: diuturnas quippe studiorum exercitationes excipiebant frequentissima pietatis opera; immo intentiores inter librorum meditationes ad Deum & divina mentem identidem extollebat, non tam certe sollicitus, ut ingenium imbueret literis, quam ut virtutibus animum exornaret, probe intelligens, nihil profuturam scientiam omnem, & ingenti studio partas cognitiones pulcherrimas, nisi fuerint cum probitate morum & virtutibus copulatæ, atque harum ope ad beatæ vitæ consecutionem proficiant. Quapropter cum in hoc utroque præclarus extiterit vir iste; atque iccirco, quia ingenio & literis maxime excelluit, pietate ac vir-

xxviii

virtutibus maxime præstans evaserit : & fuisse merito semper, & merito semper erit suspi- ciendus utroque hoc titulo, utroque hoc ti- tulo celebrandus. At hoc ipsum nimirum est, quod omnes perturbare debet maximopere, quod omnes debet tristitia summa perfundere, quod acerbissimum omnibus reddere debet e- jus interitum, tot eximia decora, immortali- tate profecto digna, unico mortis ictu disje- cta, protrita, absumpta fuisse : adeo ut fas mihi sit usurpare, quod præ nimio animi sensu & dolore de altero minus fortassis eximio viro fuit olim prolatum :

καὶ καλὸν εἴ τι λείλειπτο μετ' ἀνθρώ-
ποισιν, ὅλωλε.

Unum nihilominus in tanta æquissima & pu- blica dolendi causa præsto est doloris sola- tium, spes scilicet ipsum (quem Deus multis variisque modis probavit, ut vel a minutissi- mis culparum sordibus expiaret, & se dignum efficeret; qui omnia pertulit semper incredibili mentis tranquillitate, jucunditate cordis, ac vultus hilaritate, prompto semper animo ad plu- ra, ad graviora, ad omnia libentissime perpe- tienda; qui jamdiu vitæ in terris actæ pertæsus, adventantem sibi extremum diem minime exti- mescebat, sed præstolabatur, sed exoptabat, non ut diutinas atque molestissimas ægritudines de-

declinaret, at salubriore certè consilio, ut immortalis alterius vitæ, cujus ardore flagrabat, suavissima voluptate quamprimum perfrui sibi liceret; qui integro præsertim ægrotationis hujus temporis tempore, quam sibi postremam veluti præsentiebat, cogitationibus & curis abjectis ceteris, totus mente defixus, corde totus erga Deum & res divinas affectus, longe plurimas, ne dicam omnes, dierum singulorum horas multiplicibus pietatis exercitationibus transigebat, idque unum curabat sedulo, ut opportune omnia sibi Catholicæ Religionis mysteria & præsidia exhiberentur; qui speciosissimis his pietatis & virtutum operibus majorem morti proximus, quam vivensumquam, admirationem sui in omnibus excitavit; qui demum nocte nuper præterita tot vexatam morbis, tot confectam incommodis senectutem, non sibi quidem, sed nobis inopinata, placidissima nocturni soporis morte complevit) ipsum, inquam, spes est, summum illud æternæ felicitatis bonum vel jam fuisse assecutum, vel brevi esse consecuturum. Sed & me, qui exili nimis, rudi, & impolita oratione laudes ejus ac præcelsa merita sum persecutus, hæc recreat firma persuasio, scilicet futurum posthac, ut, quemadmodum ipse clarissimorum aliorum virorum dotes & facinora immortalita-

ta-

XXX

tati mandavit, ita plurimi inter se pro sem-
piterna meritorum ac gestorum ejus gloria,
prædicatione, literis, monumentisque decoran-
da decertent, quo ejus nomini maximus &
amplissimus apud seculorum omnium posteri-
tatem honor permaneat. Dicebam.

